

四庫全書

子部

欽定四庫全書

古今事文類聚續集卷十一

宋 祝穆 撰

居處部

簾 帷幕附

羣書要語簾廉也自鄣蔽為廉眈也

釋名

宋魏陳楚江淮

之間謂之笛自關而西謂之箔南楚謂之蓬箔

楊雍芳言

簾

箔皆以青布緣

晉東宮舊事

戶幃為簾

通俗

簾遠地則堂高

賈誼

策帷幕帷圍也以自障圍也幕絡也在裏之稱也釋名

旁曰帷在上曰幕

說文

小幕曰帟上下四旁悉周曰幄三禮

圖四合象宮室曰幄坐上承塵曰帟凡言設大次小次

者皆幄也大次在壇壝之外小次去壇遠矣山谷集帷薄

之外不趨

曲禮

猶燕之巢幕上

左

居青油幕下

沈約宋書

詩句升月照簾櫳

選

風簾自上鉤

杜

落日在簾鉤

杜

草

色入簾青

劉禹錫

珠箔垂銀鉤

李

珠簾暮捲西山雨

王勃

珍

簾疎簾看奕碁

杜

珠簾繡柱圍黃鶴

杜

蝦鬚半捲天香

散

蘇易簡

黃簾綠幕朱戶閉

韓

簾幕中間燕子飛

宋百家詩

薄

帷鑒明月

阮籍

明月何皎皎照我羅床帷

古詩

微風吹閨闥

羅帷自飄揚

選

羅幃綉幕圍春風

李賀

談笑青油幕

韓聯句

聯

重重翠幕深金屏

韓

古今事實

緯蕭為業

河上有家貧緯蕭

高也

以為業

莊子

織曲為業

周勃以織薄曲為業

織珠為簾

漢武帝起神屋以白珠為簾箔玳瑁壓之象牙為篋

漢武

故事昭陽殿以織珠為簾風至則鳴玎珰

西京雜記

居貧織簾

沈麟士居貧織簾嘗為人作簾誤傷手便流涕而還曰

遺體毀傷感而悲耳

南史

簾為妓衣

見寵妾門

絺帷見夫人

以下係帷幔

孔子見衛夫人夫人在絺帷中而拜史

帷帳不移

秦起咸陽而西至雍離宮三百帷帳不移而具

運籌帷幄

張良運籌帷幄決勝千里

帷幄無文

漢文帝帷幄不用文繡以示朴

仲舒下帷

董仲舒下帷講論

虜至坐帷中

張奐使單于休屠及朔方烏桓並日反叛遂燒度遼將軍門列屯烟火相望兵衆大恐奐安坐帷中與弟子誦

書軍士稍安

東觀漢記

伏兵帷中

孫峻欲誅諸葛恪置酒伏兵於帷中

吳志

常欲褰帷

見車門

經戶披帷

宋袁粲每過傳昭戶輒歎曰經其戶寂若無人披其帷其人斯在豈非名賢乎

幕府

衛青征匈奴大克帝拜大將軍於幕中因號幕府注幕府者以軍幕為府軍旅無常居止故以張幕言之

隔幔觀妓

見妒妻門



古今文集

律詩

簾

羅隱

疊影重紋映畫堂  
玉鉤銀燭共熒煌  
會看得見神仙在  
休下真珠十二行  
翡翠佳名世共稀  
玉堂高下巧相宜  
殷勤為囑纖纖手  
捲上銀鉤莫放垂

簾

杜世昌

編竹狀玲瓏  
庭闌盡處中  
不由經緯力  
安有捲舒功  
春

晝曾妨燕寒宵豈隔風都堂重獻賦明處憶牢籠

簾

陸暢

勞將素手捲蝦鬚  
瓊室流光更綴珠  
玉漏報來過夜半  
可憐潘岳立踟蹰

簾

王令逢

高明庭宇好崇基  
枉把疎簾窳地垂  
必欲滿堂陰有樂  
誰能暗室遂無欺  
卷舒未必風無意  
閒隙須防燕解窺  
莫道人中可遮障  
可終遮障亦何為

行障

陸暢

碧玉為竿丁字成  
鴛鴦繡帶短長縈  
強遮天上花顏色  
不隔雲中笑語聲

詩話

以帷幕擇勝

苕溪漁隱曰東坡守汝陰作擇勝亭以帷幙為之世所未有也銘略云乃作斯亭筵楹欒梁鑿枘交設合散靡常赤油仰承青幄四張我所欲往十夫可將與水升降

除地布牀又云豈獨臨水無適不臧春朝花郊秋夕月  
場無脛而趨無翼而翔敝又改為其費易償榜曰擇勝  
名實充當觀此銘則製度可見也

### 屏風

羣書要語屏風障風也宸在後所以依倚也釋名天子當

宸而立注宸屏風也記漢果愚注屏也文帝舍則潛僻

用則設張立必端直處必廉方李尤屏風銘果愚者伏思也

君朝行至內屏思惟故曰果愚古今注

詩句踟躕清防密注清防屏風也

顏延年

屏開金孔雀

杜

晴天掃畫屏

李白

古今事實

屏風畫列女

漢光武御坐新屏風圖畫列女帝數顧視宋弘正容曰  
未見好德如好色者帝命徹之

頭觸屏風

見教子門

雲母屏風

鄭弘為太尉時舉第五倫為司空班次在下每正朔朝見弘曲躬自卑上問知其故遂聽置雲母屏風分隔其間由此為故事

賜素屏風

魏志太祖平柳城頒所獲器物有素屏風持以賜毛玠曰君有古人之風故賜君以古人之服

點蠅畫屏

見蠅門

琉璃屏風

孫亮作琉璃屏風鏤作瑞應圖一百二十種

古今注

金鈿屏

石季龍作金鈿屏漆屏風衣以白縑畫義士仙人禽獸

鄴中記

刻奏疏于屏

唐太宗覽魏徵十漸疏曰方以所上疏列為屏風庶朝夕見之

錄名御屏

太宗曰治人之本莫重於刺史故錄姓名於屏風卧興對之

家誠書屏風

房玄齡恐諸子驕侈席勢凌人乃集古今家誠書屏風曰留意於此足以保躬矣

古屏婦人

元和初有士人因醉卧廳中及醒見古屏上婦人等悉於床前踏歌歌曰長安女兒踏春陽無處春陽不斷腸



士人驚叱之忽悠然上屏

西陽雜俎

按古事為屏

憲宗詔李絳摺次君臣成敗五十種為連屏張便坐

畫十事于屏

李伯時嘗畫高陽氏揖張釋之諫文帝馮媛當熊霍光取璽武帝問日磾明妃出塞王猛捫虱醉山簡李密逐太宗明皇攬鏡妃子剪髮十事列為一屏

古今文集

古詩

屏風謠

白居易

素屏素屏孰為乎不文不飾不黑不青當世豈無李陽  
冰之篆文張旭之筆跡邊鸞之花鳥張藻之松石吾不  
令加一點一畫於其上欲爾保真而全白吾于香爐峰  
下置草堂二屏倚在東西牆夜如明月入室曉如白  
雲圍我牀我心久養浩然氣亦欲與汝表裏相輝光爾  
不見當今侯家主第與王宮織成光障錦屏風綴珠陷

鈿帖雲母五金七寶相玲瓏貴豪對此方悅目晏然寢  
卧乎其中素屏素屏物各有所宜用各有所施爾今木  
為骨兮紙為面捨吾草堂欲何之

帳

羣書要語斗帳小帳也形如覆斗海錄流蘇者乃盤綠

繒綉之毬五色錯為之同心而下垂者也海錄蕙帳空兮

夜鶴怨

北山移文

詩句羅帳延秋月劉休文叨陪錦帳空杜玉帳分弓射虜

營杜冬暖號寒卧無帳坡銀盃同色試一傾排遣春寒

出幃帳

山谷

古今事實

帳中聞楚歌

見歌門

望武帳

丞相公孫弘燕見上或時不冠而見上嘗坐武帳中汲黯前奏事上不冠望見黯避帳中使人可其奏事其見敬禮如此

施絳帳

馬融為儒教養諸生常有千數善鼓琴好吹笛達生任性不拘儒者之節居宇器服多存侈飾常坐高堂施絳紗帳前授生徒後列女樂弟子以次相傳鮮有入其室者

給錦帳

漢尚書郎主作文書起草更直於建禮門臺給青縑白綾或以錦給帳帷茵褥

開幬進蚊

見蚊門

作蚊幬

黃昌夏多蚊貧無幬傭賃為作幬

後漢書

布幬紙補

羊續為廬江太守卧一幅布幬有穿敗糊紙補之

卧丞相帳中

許侍郎顧司空俱作王丞相從事常夜在丞相所飲二人歡極丞相便使入已帳中眠顧至曉猶展轉不得熟

寐許上牀便大鼾丞相語諸客曰此中亦是難眠處耳

子郭

銷金帳

見聘門

古今文集

律詩

紙帳

蘇子瞻

亂紋龜殼細相連慣卧青綾恐未便潔似僧中白氎布  
暖於蠻帳紫茸氎錦衾速卷持還客破屋那愁仰見天

但恐嬌兒還惡卧夜深踏裂不成眠

詩話

百子帳

程泰之

唐人昏禮多用百子帳特貴其名與昏宜而其制度則非有子孫衆多之義蓋其制本出戎人特穹廬拂廬之具體而微者耳捲柳為圈以相連鎖百張百闔為其圈之多也故以百子揔之亦非其有百圈也其弛張既成大抵如今尖頂圓亭子而用青氊通冒四隅上下便於



移置耳白樂天有青氍毹詩其規模可考也其詩始曰  
合聚千羊毳施張百子卷骨盤遶柳健色染塞藍鮮其  
下注文自引史記張空羣為證即是以柳為圈而青氍  
毹之也又曰北製因戎剏南移逐境遷是制出戎人也  
有頂中央聳無隅四向圓是頂聳旁圓也既曰影孤明  
月夜又曰最宜霜後地則是以之弛張移置於月於霜  
隨處皆可也又曰側置低歌坐平鋪小舞筵則其中亦  
差寬矣既曰銀囊帶火懸又曰獸炭休親近則是其間

不設燎爐但用銀囊貯火虛懸其中也又曰蕙帳徒招  
隱茅菴浪作禪其所稱比但言蕙帳茅菴而不正比穹  
廬知其制出穹廬也樂天詩最為平易至其鋪叙物制  
如有韻之記豈世之徒綴聲韻者所能希哉

演繁露

牀

胡牀  
襦褥

榻

羣書要語牀裝也所以自裝載也

釋名

齊魯之間謂之簀

陳謂之第

揚雄  
方言

牀身之安也簀牀輶也

說文

牀三尺五曰

榻板獨坐曰枰八尺曰牀

服虔通  
俗文

或息偃在牀詩剥牀

以膚易蕙幃兮荃牀

曹植

榻長狹而卑曰榻言其榻然近

地小者坐人無異獨所坐也

釋名

詩句白玉為君牀

選

衰病只藜牀

杜

西齋深且明中有

六尺牀

坡

甘寢就匡牀

后

明月皎皎照我牀

選

風月坐

胡牀

歐

自許奇觀繞繩牀

山谷

連榻設華裯

謝靈運

坐客寒

無氊

杜

褥隱繡芙蓉

杜

古今事實

獻象牙牀

孟嘗君出行五國至楚獻象牙牀

戰國策

眠牀塵埃

齊虞愿除後軍將軍褚彥回詣愿不在見其眠牀上積塵埃有書數卷彥回嘆曰虞君之清乃至此令人掃地拂牀而去

移牀壁崩

齊徐孝嗣初在率府書卧齋北壁下夢兩童子遽云移公牀孝嗣驚起聞壁有聲行數步壁崩

六尺方牀

宋賀革家貧躬耕供養年二十始輟耒就父受業有六尺方牀思義未達則橫卧其上不盡其義終不肯食

當坐此牀

李靖左僕射楊素拊其牀謂曰卿終當坐此牀封倫傳內史令楊素每撫其牀曰封郎終當據此

登嚴武牀

杜甫嘗醉登嚴武牀瞪視曰嚴挺之乃有此兒武亦暴

猛中銜之

據胡牀曬頭

以下係  
胡牀

謝萬嘗詣王恬既至坐少時王便入內謝殊有喜色謂  
必厚供待良久沐頭散髮而出亦復不坐乃據胡牀在  
中庭曬頭神氣傲然了無相酬對

據胡牀談譔

見月門庾  
亮南樓

據胡牀吹笛

見笛  
門

胡牀掛柱

魏裴潛為兗州刺史嘗作一胡牀及去官留以掛柱

當膝榻穿

以下  
係榻

管寧字幼安常自坐一木榻積五十年當膝處穿

高士  
傳

陳蕃下榻

陳蕃為豫章太守不接賓唯徐孺子來特設一榻去則  
懸之

獨擅一榻

簡雍性簡傲自諸葛亮以下則獨擅一榻須枕卧語無

所為屈

引僧升榻

顏延之為秘書監光祿勳太常時沙門釋惠林以才學為文帝所賞朝廷政事多與之謀上每引見常升獨榻延之甚嫉焉因醉曰昔子同驂乘袁絲正色此三台之座豈可使刑餘居之上變色

坐針氈

杜錫遷太子中舍屢諫愍懷太子言辭懇切太子患之



後置針著錫常所坐處氈中刺之流血

青氈舊物

王子敬卧齋中盜取物敬曰青氈我家舊物可特置之

裏氈墜崖

魏鄧艾由陰平道伐蜀行無人之境七百餘里山高谷深瀕於危殆艾以氈自裹推轉而下將士攀木緣崖魚貫而進

鋪花為裯

學士許慎選放曠不拘小節多與親友結宴花園中未嘗具帷幄設坐只使僮僕輩聚落花鋪坐下曰吾自有

花裀

開元遺事

### 狔毛為坐

狔坐不知始何時唐以前猶未施用太平興國中詔工商庶人許垂烏漆素鞵不得用狔毛暖坐則當時蓋通上下用之矣天禧元年始定兩省五品宗室將軍以上許垂狔毛暖坐餘悉禁遂為定制今文臣自中書舍人

以上武臣節度使以上方許用而宗室將軍之制亦不

行矣

石林燕語

元豐儀制令侍從職事官諫議大夫以上

乘狨坐紹興令諸狨毛坐職事官諫議大夫寄祿官太

中大夫以上及學士待制或經恩賜者許乘節度使曾

任執政者准此 楊文公曰狨類鼠而大尾長而金色

生川陝深山中人以藥矢射殺之取其尾為卧褥鞍被

坐氈之用狨甚愛其尾既中毒即嚙斷其尾以擲之惡

其為身患

談錄

虎皮坐

尹彥明云橫渠昔在京師坐虎皮說周易聽從甚衆一夕二程先生至論易次日橫渠撤去虎皮曰吾平日為諸公說者皆亂道有二程近到深明易道吾所弗及汝輩可師之故朱文公作橫渠贊云勇撤皐比皐比見左傳

古今文集

古詩

胡牀

梁庾肩吾

傳名乃外域入用信中京足歌形已正文斜體自平臨  
堂對遠客命旅誓初征何如淄館下淹留奉盛明

詩話

論胡牀之義

今之交牀制本自胡來始名胡牀桓伊下馬踞胡牀取  
笛三弄是也隋以識有胡改名交牀胡瓜亦改黃瓜唐  
柴紹擊西戎據胡牀使兩女子舞則唐史臣追本語以

書也唐穆宗長慶二年十二月見羣臣禮紫宸殿御大繩牀則又名繩牀矣

### 繩牀

孟東野詩云繩牀獨坐翁李濟翁資暇錄改為藤牀誤矣林學

簟

衾枕

湯婆並見衾門

竹夫人

羣書要語簟竹席也

說文

簟者布之簟然平也

釋名

宋魏問

謂之筵或謂之簾曲自闕而東謂之簟其粗者謂之簾

蔭直文而粗自關而東周楚魏之間謂之倚佯自關而西謂

之行唐方言下筦上簟乃安斯寢斯干桃笙象簟韜於筒中

都左三

詩句珍簟夏含霜謝元暉枕簟入林僻杜酒醒思卧簟杜

恩分夏簟冰杜羸肌與簟疎劉言史留客夏簟清琅玕杜

古今事實

送所坐簟

晉王忱訪王恭見恭所坐六尺簟忱謂其有餘因求之

輟以送焉遂坐薦上忱聞而驚恭曰吾平生無長物

賞五花簞

宋尚書令王儉嘗集才學之士摠校虛實類物以隸之謂之麗事多者賞之惟廬江何憲為勝乃賞以五花簞白團扇坐簞執扇容氣甚自得秣陵令王摘後至儉以所隸示摘操筆便成舉坐賞擊摘乃命左右抽憲簞自掣取扇登車而去

古今文集



古詩

鄭羣贈簞

韓愈

斲州笛竹天下知鄭君所寶尤瓌竒攜來當晝不得卧  
一府傳看黃琉璃體堅色淨又藏節盡眼凝滑無瑕疵  
法曹貧賤衆所易腰腹空大何能為自從五月困暑濕  
如坐深甑遭蒸炊手磨袖拂心語口慢膚多汗真相宜  
日暮歸來獨惆悵有賣直欲傾家貲誰謂故人知我意  
卷送八尺含風漪呼奴掃地鋪未了光彩照耀驚童兒

青蠅側翅蚤虱避肅肅疑有清飈吹倒身酣寢百疾愈  
却願天日常炎曦明珠青玉不足報贈子相好無時衰  
有客贈余以石枕者與家所藏笛竹簟皆佳  
物也余既喜睡因甚愛之輒為拙句奉呈原  
甫聖俞二君子  
歐陽永叔

端溪琢出缺月樣蘄州織成雙水紋呼兒置枕展方簟  
赤日正午天無雲黃琉璃光綠玉潤瑩淨冷滑無埃塵  
憶昨開封暫陳力屢乞殘骸避煩劇聖君矜憐大臣憫

察見衰病非虛飾尤蒙不使加罪去特許遷官還舊職  
選材任事不堪用見利無慙惟苟得一從僦屋居城南  
官不坐曹門少客自然惟與睡相宜以懶遭閒何愜適  
從來羸繭苦疲困況此煩歎正炎赫少壯喘息人莫聽  
中年鼻鼾尤惡聲癡兒掩耳謂雷作竈婦驚窺疑釜鳴  
蒼蠅蠛蠓任緣撲蠹書懶架拋縱神昏氣濁一如此  
言語思慮何由清昔時李白愛飲酒欲與鐙杓同生死  
我今好睡又過之身與二物為三爾江西得請在旦暮

收拾歸裝從此始終當卷簾攜枕去築室買田清潁尾  
次韻歐陽永叔端溪石枕蘄竹簟

王介甫

端溪琢枕綠玉色蘄水織簟黃金紋翰林所寶此兩物  
笑視金玉如浮雲都城六月招客語地上赤日流黃塵  
燭龍中天進炎力客主歎然各疲劇形骸直欲坐棄忘  
冠帶安能強修飾恃公寬貸更不疑箕踞豈復論官職  
笛材平瑩家故藏硯璞坳清此新得掃除堂屋就陰翳

公不自眠分與客知公用意每如此真能與物同其適  
豈比法曹空自私却願天日長炎赫公材卓犖人所驚  
久矣四海流名聲天方選取欲扶世豈特使以文章鳴  
深探力取當不寐思以正議排縱橫柰何甘心一榻上  
欲卧穎尾為潔清賢愚勞佚非一軌顧我病昏惟未死  
心於萬事久蕭然身寄一官真偶爾便當買宅歸偃休  
白髮溪山如願始看公戮力就太平却上青天跨箕尾

次韻和酬

梅聖俞

溪上枕剖龍卵石，斲匠簞裂蛇皮紋。客從東方一持贈，  
竹色烝青石抱雲。磨沙斲骨自含潤，飽霜弔節無留塵。  
京師豪貴空有力，六月柰此炎蒸劇。旱風赤日吹熱來，  
大廈高簷任雕飾。頭顱汗匝無富貧，雖有頒冰論官職。  
官高職重冰則多，日永冰銷難更得。唯公掃室施枕簞，  
迎涼自感東方客。東方客應非俗昏，能使賢人心體適。  
賢人何以偏伏人，天下才名方赫赫。我吟窮困不可聽，  
晝夜蚊蚋蒼蠅聲。蠅如遠雞耳，初感蚊若隱雷空際鳴。

葛厨頂綻屋蝎墮管席中裂麻經橫平生賦分只煎炒  
安有綠玉琉璃清猶勝昔年杜子美老走來陽牛膏死  
因思楊惲廢時言但願人生行樂耳公今事業在朝廷  
去就尤當慎終始待公睡足秋風來去奉高談揮麈尾

寄蘄簞與蒲傳正

蘇子瞻

蘭溪美箭不成笛離離玉筍排霜脊千溝萬縷自生風  
入手未開先慘慄公家列屋閒蛾眉珠簾不動花陰移  
霧帳銀床初破睡牙籤玉局坐彈碁東坡病叟長羈旅

凍卧饑吟似饑鼠倚賴春風洗破衾一夜雪寒披故絮  
火冷燈青誰復知孤舟兒女自嚶伊聖天何時反炎燠  
愧此八尺黃琉璃願公盡掃清香閣卧聽風漪聲滿榻  
習習還從兩腋生請公垂此朝閭闔

律詩

白角簾

曹松

角簾工夫已到頭夏來全占滿林秋若言保借歸華屋  
祇合封題寄列侯學卷曉冰常怕綻解鋪寒水不教流



蒲桃錦是瀟湘紙曾得王孫價倍酬

碧角簾

曹松

細皮重疊織霜紋滑膩鋪牀勝錦茵  
八尺碧天無點翳一方青玉絕纖塵  
蠅行只恐煙黏足客卧渾疑水浸身  
五月不教炎氣入滿堂秋色冷龍鱗

席

羣書要語薦所以自薦藉也席繹也可卷可舒也

釋名羣

居五人則長者必異席 為人子者居不主與坐不中

席 父子不同席男女不同席 奉席如橋衡請席何

鄉請衽何趾席南鄉北鄉以西方為上東鄉西鄉以南

方為上若非飲食之客則布席席間函丈主人跪正席

客跪撫席而辭客徹重席主人固辭客踐席乃坐

並曲禮

我心匪席不可卷也

詩

席不正不坐

語

大路越席昭其

儉也

左

瑤席兮玉鎮

楚辭

詩句初霜刈渚蒲織作玉牀席

李白

心懷平生友莫一在

席珍

古今事實

孔席不暖

孔席不暖

班賓戲孔子

困於陳蔡之間居環堵之內坐三

經之席

說苑

席上之珍

哀公命席孔子曰儒有席上之珍以待聘

舍者避席

楊朱南之沛至梁而遇老子曰而睢睢而盱盱而誰與

居大白若辱盛德若不足楊朱曰敬聞命矣其往也舍者迎將家公執席妻執巾櫛舍者避席煬者避竈其反也舍者與之爭席

列黃帝

### 坐熊席

衛靈公天寒鑿池宛春諫曰天寒起土恐傷民公曰天寒乎宛春曰公衣狐裘坐熊席陬隅有竈是以不寒

### 坐不重席

孟懿伯相魯食不二味坐不重席

家人販席

臧文仲不仁者三妾織蒲家人販席與民爭利

敝席為門

陳平以敝席為門

前席賈誼

文帝思賈誼召至宣室夜半前席

故人避席

漢相田蚡為壽坐者避席及竇嬰為壽故人避席餘半

膝席

專席而坐

武帝特詔御史中丞與司隸校尉尚書令會同並專席而坐故京師號曰三獨坐

說經奪席

戴憑徵博士詔公卿大會羣臣皆就席憑獨立世祖問其意對曰博士說經皆不如臣而坐居臣上是以不得就席帝令與諸儒難說帝善之後正旦朝賀令羣臣說

經更相難詰義有不通輒奪其席以益通者憑遂重坐五十餘席故京師語曰解經不窮戴侍中

三公絕席

張禹為太傅尚書鄧太后以殤帝初育欲令重臣居禁內乃詔禹與三公絕席

兼葭為席

鄭敬以兼葭為席常隨杞柳之陰

不與惡人同席

許敬字鴻卿其吏有誣君者會於縣令坐敬拔刀斷其席曰敬不忍與惡人同席

席為冬設

吳議郎張純詣鎮南將軍朱據據曰為賦一物然後乃坐純賦曰席為冬設簟為夏施揖讓而坐君子攸宜

管寧割席

魏管寧與華歆讀書有乘軒冕者過門歆出看寧曰富貴須自致窺他人乎遂割席半分而坐曰子非吾友也



舉席自障


盧懷慎門不施箔風雨至舉席自障

古今文集

雜著

武王席銘

武王踐阼席前左端之銘曰安樂必敬前右端之銘曰  
無行可悔後左端之銘曰民一反一側爾不可不念後  
右端之銘曰所鑒不遠視爾之所代



古今事文類聚續集卷十一

欽定四庫全書

子部

古今事文類聚續集卷十二

詳校官中書

臣孫衡

侍讀

臣孫球覆勘

總校官編修

臣王燕緒

校對官中書

臣潘奕雋

謄錄監生

臣俞昌言

欽定四庫全書

古今事文類聚續集卷十二

宋 祝穆 撰

香茶部

香 香爐附

羣書要語凡香之屬皆曰香遠聞曰馨美者曰馥音氣

曰馥說文至治馨香感於神明尚書有飮其香邦家之光載

其香始升生民南方有香市乃商人交易處述異記南海郡

有採香戶

同上

取大甲香如崑崙耳者酒煮蜜熬入諸香

用

四時纂要

近世尚奇者鏤木以為之範香塵為篆文準十

二辰分百刻凡燃一晝一夜或然於飲席或佛像前

香譜

以雜香擣之丸如梧桐子大青繩穿之謂之香珠燒之

香徹天

三洞珠囊

因香所生以為香界

楞嚴經

香爐皇太子初拜有銅博山為爐

東宮舊事

其爐象海中博

山下盤貯湯使潤氣蒸香以象海之四環

呂大臨考古圖

香獸

以塗金為狻猊麒麟鳬鴨之狀空其中以燃香使煙自

口出以為玩好復有雕木埏土為之者

香譜

詩句百和清夜吐

沈約

燕寢凝清香

韋蘇州

燈影照無寐心

清聞妙香

杜

蛛絲凝篆香

山谷

朝罷香煙攜滿袖

杜

香爐博山鑪中百和香鬱金蘇合及都梁

吳均

睡鴨香鑪

團夕燠

李商隱

衣冠身染御爐香

杜

博山吐香五雲散

韋

日烘荀令炷香爐

山谷

午夢不知緣底事篆煙燒盡一盤

花

劉屏山

古今事實

三疊香

莊公束縛管仲以子齊使齊使受之而退比至三疊三浴之注以香塗身曰疊亦或為薰

齊語

燒異香

宋景公燒異香於臺上有野人被草負笈扣門而進是為子韋世司天部

洪芻香譜

號香尉

漢雍仲子進南海香物拜涪陽尉人謂之香尉

述異記



雞舌香

漢尚書郎懷香握蘭含雞舌香

官儀

衣薰香

金日磾入侍欲衣服香潔無污穢氣自合一香武帝果

悅之

洪芻香譜

禁熏香

魏武令云天下初定吾便禁家內不得熏香

韓壽竊香

見淫婦門

佩紫香囊

見叔姪門

性愛薰香

劉季和性愛香常如廁還輒過香爐上主簿張坦曰人名公作俗人不虛也季和曰荀令君至人家坐席三日香比我如何坦曰醜婦效顰見者必走公欲人遁走耶

季和大笑

襄陽記

焚香數車

唐太宗與蕭后宮中觀燈問孰與隋主曰彼亡國之君

陛下開基之主奢儉不同爾帝曰隋主何如后曰每除  
夜殿前諸位設火山數十每一山焚沈香數車沃以甲  
煎焰起數丈香數十里一夜用沈香二百餘車甲煎一  
百餘石房中不燃膏火懸寶珠一百二十照之太宗曰  
刺其奢心服其盛

續世說

### 沈香為亭

唐敬宗時波斯進沈香亭子材拾遺李漢諫曰沈香為  
亭何異瑤臺瓊室

香中忌麝

唐鄭注赴河中姬妾百餘盡薰麝香氣數里逆於人鼻是歲自京兆至河中所過瓜盡一蒂不獲

賜龍腦香

元宗夜宴以琉璃器盛龍腦數斤賜羣臣馮謐曰臣請效陳平為宰自丞相以下皆跪授尚餘其半乃捧拜曰勅賜錄事馮謐元宗笑許之

沈檀香亭

唐開元中有沈香亭子宣州觀察使楊牧造檀香亭子  
初成命賓樂之

四香為閣

楊國忠嘗用沈香為閣檀香為欄檻以麝香乳香篩土  
和為泥飾閣壁每於春時木芍藥盛開之際聚賓於此  
閣上賞花焉禁中沈香之亭殆不侔此壯麗也

天寶遺事

瑤英啗香

元載寵姬薛瑤英母趙娟幼以香啗英故肌肉悉香

杜陽

編

香嚴童子

香嚴童子白佛言我諸比丘燒水沈香香氣寂然來入  
鼻中非水非空非煙非火去無所著來無所從由是意  
銷發明無漏得阿羅漢

異香成穗

二十二祖摩訶羅至西印土焚香而月氏國王忽覩異

香成穗

傳燈錄

獻薔薇水

周顯德五年昆明國獻薔薇水十五瓶云得自西域以  
洒衣衣敝而香不滅

焚香返魂

司天主簿徐肇遇蘇氏子德哥者自言善為返魂香手  
持香爐懷中取一貼白檀香末撮於爐中煙氣裊裊直  
上甚於龍腦德哥微吟曰東海徐肇欲見先靈願此香  
煙用為引導盡見其父母曾高德哥曰死經八十年已

上則不可返矣

並洪芻  
香譜

造帳中香

江南李主帳中香法以鵝梨蒸沈香用之

洪駒  
父

以袖罩香

梅學士詢性喜焚香其在官所每晨起將視事必焚香  
兩爐以公服罩之撮其袖以出坐定撒開郁然滿室濃

香時又謂之梅香

歸田  
錄

被中香爐

以下係  
香爐



長安巧手丁諤者作被中香爐為機環轉之運四周又作九層博山香爐鏤以奇禽恠獸皆自然能動

西京雜記

### 帳角香爐

石季龍冬月為複帳四角安純金銀鑿鏤為香爐

鄴中記

### 失爐筮卦

吳郡吳泰能筮會稽盧氏失博山香爐使泰筮之泰曰此物質雖為金其象寶山有樹非林有孔非泉闔閭晨興見發青煙此香爐也語其處求即得

集異記

宗超香奩

宗超嘗露壇行道奩中香盡自然滿溢爐中無火煙自出

五方香牀

隋煬帝觀文殿前兩廂為堂各十二間堂中每間十二寶厨前設五方香牀綴貼金玉珠翠每駕至則宮中擎香爐在輦前行

古今文集

雜著

香序

宋范曄

麝本多忌過分必害沈實易和盈斤無傷零藿慘虐唐粘濕甘松蘇合安息鬱金梛多和羅之屬並被於外國無取於中土又棗膏昏蒙甲馘淺俗非惟無助於馨烈乃當彌增於尤疾也

此序所言悉比類朝士麝本多忌比庾懜之棗膏昏蒙比羊玄保甲馘淺俗比徐湛之甘松蘇合比

惠休道人沈實易和蓋自比也

香譜

泉守葉庭

乳香一名薰陸香出大食之南數千里其樹類松以斤  
砍樹脂溢于外結而成香聚而成塊上品為揀香圓大  
如指頭今俗所謂滴乳次曰瓶乳言收時置于瓶中又  
次曰乳榻蓋香而雜之以沙石者也又次曰黑榻蓋香  
之黑色者也又次曰水濕黑榻蓋香在舟中為水所浸  
漬而氣變色敗者也雜品而碎者曰斫削簸揚為塵者

曰纏末 腦子出渤泥三佛齊亦有之乃深山窮谷中  
經千年老杉樹其枝幹不曾損動者若損動而氣泄無  
腦矣其土人解作板段隨其板傍橫裂而成縫有腦出  
於縫中劈而取之其大者成片俗謂之梅花腦其次者  
謂之速腦速腦之中其次者謂之米腦 沈香其木類  
椿櫟多節取之先斷其木根積年皮幹俱朽心與節不  
壞者香也細枝緊一實為青貴香黑而沈水者為沈香  
半浮沈者為鷄骨香最粗者為箋香

類證  
本草

沈香所出非

一真臘為上占城次之渤泥為下然就真臘而較之則  
又有三品綠洋為上三灤次之勃囉間為下而香之大  
緊生結者為上熟脫者次之堅黑者為上黃者次之狀  
如犀角者謂之犀角沈如燕口者謂之燕口沈如附子  
者謂之附子沈如梭者謂之梭沈文橫而堅緻者謂之  
隔沈生沈香蓬萊香出海南山西其初連木則狀如栗  
棘房土人謂之刺香刀剗木而出其香則堅緻而光澤  
士大夫謂之蓬萊香同蕃沈出於渤泥三佛齊醫家多

用之亦謂之藥沈同箋香乃沈香之次者 香有三等

曰沈曰箋曰黃熟沈箋皆有二品曰熟結曰生結熟結

者樹自爛而得生結者伐仆得之又久爛脫而剔取之

黃熟有三品曰夾箋其破者為散沈香之良者也瓊崖

生取者為角沈宜薰衣木枯朽乃得者為黃沈宜入藥

談苑及  
倦游錄

一木四香根曰旃檀節曰沈香花曰雞舌膠

曰薰陸

酉陽  
雜俎

生熟速香伐樹去木而取香者謂之生

速樹仆於地木腐而香存者謂之熟速 檀香出於三

佛齊國皮木而色黃者謂之黃檀皮腐而色紫者謂之紫檀恐其氣泄則以紙封之 黃熟香皮堅而中腐者其形如桶故謂之黃熟桶其夾箋而通黑者其氣尤勝 鷓鴣斑體薄而易燼其厚而沈水者差久 暫香乃熟速之次者但脫者謂之熟速而木之半存者謂之暫香同上降真香氣勁而遠能辟邪氣 篤耨香出真臘國亦樹之脂也樹如松杉之類而香藏之皮樹老而自然流溢者色白而透明故其香雖盛暑不融土人既取之



矣夏月以火環其樹而炙之令其脂液再溢至冬沍寒  
因其凝而復取之故其香冬凝而夏融土人盛之以瓠  
瓢至暑月則鑽其瓢而周為之孔藏之米中欲其陰涼  
而氣通以泄其汗故得不融舟人易之以瓷器不若瓢  
也香之氣清遠而長雜於樹皮則黑而黑為下矣香之  
性易融而暑月之融多滲於瓢故斷瓢而熟之亦得其  
典刑今所謂葫蘆瓢是也 麝香木出占城國樹老而  
仆埋於地而腐外黑而內黃赤者其氣類於麝 龍涎

出大石國其龍多蟠於洋中之大石卧而吐涎衆魚聚而嚼之土人見則沒而取焉然龍涎無香其氣近於臊白者如百藥而膩理黑者亞之如五靈脂而光澤能發衆香故人常用之以和香焉 薔薇水大食國花露也今則採茉莉取其液以代焉然其水多偽雜試之當用琉璃瓶盛之翻搖數四其泡周上下者為真 安息香出三佛齊國其香乃樹之脂也其形色類胡桃穰而不宜於燒然能發衆香故人取之以和香焉 亞濕香出

占城國其香非自然乃土人以十種香搗和而成體濕而黑氣和而長熱之勝於他香 塗肌拂手香皆出占城國土人以腦麝諸香搗和而成或以塗肌或以拂手其香經數宿不散 金顏香正出大食真臘國其香乃樹之脂色黃而氣勁工於聚衆香今之為龍涎軟香佩帶者多用之 蘇合香油亦出大食國氣味大抵類篤耨 雞舌香一名丁子香以其形似丁子香也即丁香之大者今謂丁香母是也日華子云治口氣 生結香

產高竇等州山民見香木曲榦斜枝以刀斫成坎經年

得雨水漬復鋸取之刮去白木其香結為班點亦名鷓

鴝班

倦游錄

螺甲雲南者如掌青黃色取麝燒灰合香者

多用之

本草

修甲香方取大甲香如崑崙耳者酒煮蜜

熬入諸香中用艾納出西國似艾蓋松皮上蘚衣合

和諸香燒之其煙團聚清白可愛

本草

香說

程泰之

秦漢以前二廣未通中國中國無今沈腦等香也宗廟

病蕭灌獻尚鬱食品貴椒至荀卿氏方言椒蘭漢雖已  
得南粵其尚臭之極者椒房郎官以雞舌奏事而已較  
之沈腦其等級之甚下不類也惟西京雜記載長安巧  
工丁諤作被下香爐頗疑已有今香然劉向銘博山鑪  
亦止曰中有蘭錡青火朱煙玉臺新詠說博山鑪亦曰  
朱火然其中青煙颺其間香風難久居空令蕙草殘二  
文所賦皆焚蘭蕙而非沈腦是漢雖通南越亦未見越  
香也漢武內傳載西王母降熱嬰香等品多名異然疑

後人為之漢武奉仙窮極宮室帷帳器用之麗漢史備  
記不遺若曾初有古來未有之香安不悉記

演繁露

古詩

賈天錫惠寶薰以兵衛森畫戟燕寢凝清香

十詩報之

黃魯直

險心游萬仞躁欲生五兵  
隱几香一炷靈臺湛空明  
晝食烏窺臺宴坐日過砌  
俗氛無因來煙霏作輿衛  
石蜜化螺甲楨櫨煮水沈  
博山孤煙起對此作森森

輪囷香事已郁郁著書畫誰能入吾室脫汝世俗械  
賈侯懷六韜家有十二戟天資喜文事如我有香癖  
林花飛片片香歸銜泥燕閉閣和春風還尋蔚宗傳  
公虛采蘋宮行樂在小寢香光多發聞色敗不可稔  
床帷夜氣馥衣桁晚煙凝瓦溝鳴急雪睡鴨照華燈  
雉尾映鞭聲金爐拂太清班近聞香早歸來學得成  
衣篝麗紈綺有待乃芬芳當念真富貴自薰知見香

有惠江南帳中香戲答六言

黃魯直

百鍊香螺沈水寶薰近出江南一縷黃雲繞几深禪相  
對同參螺甲割崑崙耳香材屑鷓鴣班欲雨鳴鳩日永  
下帷睡鴨春閒我讀蔚宗香傳文章不減二班誤以甲  
為淺俗却知麝要防閑

燒香

楊廷秀

琢瓷作鼎碧於水削銀為黍輕如紙不文不武火功均  
閉閣下簾風不起詩人自炷古龍涎但令有香不見煙



素馨忍聞抹利折抵處麝和檀沈平生飽識山林味  
不柰此香殊斌媚呼兒急取蒸木犀却作書生真富貴  
律詩

清真香歌

丁公言

四兩玄參三兩松麝香半分蜜和同丸如彈子金爐熱  
還似花心噴曉風

邃老寄龍涎香

劉子翬

瘴海驪龍供素沫蠻村花露挹清滋微參鼻觀猶疑似

全在爐煙未發時

香

邵堯夫

安樂窩中一炷香  
凌晨焚意豈尋常  
禍如許  
免人須詔福  
若待求天可量  
且異緇黃徼廟貌  
又殊兒女裒衣裳  
非圖聞道至於此  
金玉誰家不滿堂

雜著

以下係  
香爐

薰爐銘

漢劉向

嘉此正氣  
蘄若山上貫  
泰華承以銅  
盤中有蘭  
錡朱

火青煙

香爐銘

梁元帝

蘇合氤氲非煙若雲時濃更薄乍聚還分火微難盡風  
長易聞孰云道力慈悲所薰

古詩

古樂府詠香爐

四坐且莫諠願聽歌一言請說銅香爐崔嵬象南山上  
枝似松柏下枝據銅盤雕文各異類離婁自相連誰能

為此器公輸與魯班朱火燃其中青煙颺其間順風入  
君懷四坐莫不歡香風難久居空令蕙草殘

博山香爐

齊劉繪

參差鬱佳麗合沓紛可憐蔽虧千種樹出沒萬重山上  
鏤秦王子駕鶴乘紫煙下刻螭龍勢矯首半銜連傍為  
伊水麗芝蓋出巖間後有漢游女拾翠弄餘妍榮色何  
雜揉縟綉更相鮮麝麝或騰倚林薄杳芊眠掩華如不  
發含薰未肯燃風生玉階樹露湛曲池蓮寒蟲飛客室

秋雲沒曉天

茶 水品附

羣書要語茶者南方嘉木自一尺二尺至數十尺其巴  
川峽山有兩人抱者伐而掇之樹如瓜蘆葉如梔子花  
白如薔薇實如楸欄蒂如丁香根如胡桃其名一曰茶  
二曰櫟三曰設四曰茗五曰薺經茶劍南有蒙頂石花湖  
州有顧渚紫筍峽州有碧澗明月補國史郭璞云早取為  
茶晚取為薺經茶凡茶少湯多則雲脚散湯少茶多則乳

面聚上同沫餗者湯之華也如晴天爽朗有浮雲則鱗

然華之薄者曰沫厚者為餗輕細者為花陸羽茶經釋滯消

壅一日之利漸佳瘠氣浸精終身之累斯大獲益則歸

功茶力貽患則不謂茶災豈非福近易知禍遠難見者

乎

母景休  
茶飲序

詩句破睡見茶功白春風啜茗時杜閩實東吳秀茶稱

瑞草魁

杜

揀芽分雀舌賜茗出龍團

坡

銀瓶貯浪水一

掬松雨聲來乳茶熟崔湯添勺水煎魚眼未下刀圭攪

麴塵

白集

思公煮茗共湯鼎蚯蚓竅生魚眼珠

山谷

香包解

盡寶帶胯黑面碾出明窓塵

山谷

然松煮鼎山泉冽槍旗

一水分優劣鳳餅推開雪照人花瓷啜罷甘潮舌

劉彥冲

古今事實

作書求茶

劉琨與弟羣書吾體中憤悶常仰真茶汝可信信致之

茗為酪奴

齊王肅歸魏初不食羊肉及酪漿常食鯽魚羹渴飲茗

汁高帝曰羊肉何如魚羹茗汁何如酪漿肅曰羊陸產之最魚水族之長羊比齊魯大邦魚比邾莒小國惟酪不中與茗為奴彭城王勰曰卿不重齊魯大邦而愛邾莒小國明日為設邾莒之會亦有酪奴因呼茗為酪奴

洛陽伽藍記

### 唐始稅茶

唐德宗貞元九年初稅茶原是鹽鐵使張滂奏請稅茶以待水旱之闕賦詔曰可是歲得錢數十萬

實錄



推茶困民

鄭注為推茶法詔王涯為推茶使王涯益變茶法益其稅以濟用度下益困

陸羽茶經

竟陵僧有於水濱得嬰兒者育為弟子稍長自筮遇蹇之漸繇曰鴻漸于陸羽可用為儀乃姓陸氏字鴻漸名羽有文學恥一物不盡其妙茶術最著鴻漸嗜茶著經三篇言茶之原之法之具尤備天下益知飲茶矣

作瓷人沽茗

鞏縣為瓷偶人號陸鴻漸買十器得一鴻漸市人沽茗不利輒灌之

恥於煎茶

有常伯熊者因羽論復廣著茶之功御史大夫李季卿宣慰江南次臨淮知伯熊善煮茶召之伯熊執器煎季卿為再舉盃季卿至江南又有薦羽者召之羽衣野服挈具而入公心鄙之茶畢命奴子取錢三十文酬煎茶

博士羽愧之更著毀茶論

語林

嗜顧渚茶

甫里先生陸龜蒙嗜茶葺置小園於顧渚山下歲入茶租薄為甌蟻之費自為品第一篇繼茶經茶訣之後

以菊易茶

白樂天方齋禹錫正病酒禹錫乃饋菊苗蔬蘆服鮓換取樂天六班茶二囊以自醒酒

蠻甌志

苦令飲茶

王濛好茶人至輒飲之士大夫甚以為苦每欲候濛必

云今日有水厄

伽藍記

斛二瘕

有人喜飲茶飲至一斛二斗一日過量吐如牛肺一物以茗澆之容一斛二斗客云此名斛二瘕

太平御覽

雪水烹茶

見雪門

始造建茶

建州大小龍團始于丁晉公而成於蔡君謨宋太平興

國二年始置龍焙造龍鳳茶咸平中丁晉公為福建漕  
監造御茶進龍鳳團慶厯間蔡公端明為漕始改造小  
龍團茶仁宗尤所珍惜是後最精者曰龍團勝雪外有  
密雲龍一品號為奇絕方靈芽數圻之初常先民焙十  
餘日進發飛騎疾馳不出中春頭綱已至京師

郡志

### 譏始進茶

歐陽永叔聞君謨進小龍團驚歎曰君謨士人也何至

作此事

郡志

拔茶植桑

張詠令崇陽民以茶為業公曰茶利厚官將摧之命拔茶而植桑民以為苦其後摧茶他縣皆失業而崇陽之桑已成其為絹歲百萬匹

逸人致水

以下係水品

南陽張又新為水記凡七等其二曰慧山寺石泉其三曰虎丘寺石井其六曰吳松江是三水距先生遠不百里高僧逸人時致之以助其好

先生謂陸龜蒙

辨煎茶水

贊皇公李德裕居廊廟日有親知奉使于京口李曰還日金山下揚子江南零水與取一壺來其人舉棹日醉而忘之泛舟至石城下方憶乃汲一瓶於江中歸京獻之李公飲後歎訝非常曰江表水味有異於頃歲矣此水頗似建業石頭城下水其人謝過不隱

辨煎茶湯

李約沂公子也一生不近粉黛性嗜茶嘗曰茶須緩火

炙活火煎活火謂炭火之有焰者當使湯無妄沸庶可  
養茶始則魚目散布微微有聲中則四邊泉湧纍纍連  
珠終則騰波鼓浪水氣全消謂之老湯三沸之法非活  
火不能成也

因話錄

古今文集

雜著

進茶錄序

蔡襄

臣前因奏事伏蒙陛下諭臣先任福建轉運使日所進



上品龍茶最為精好臣退念草木之微首辱陛下知鑒  
若處之得地則能盡其材昔陸羽茶經不第建安之品  
丁謂茶圖獨論採造之本至於烹試曾未有聞臣輒條  
數事簡而易明勒成二篇名曰茶錄伏惟清閒之宴或  
賜觀采臣不勝惶恐榮幸之至謹序

上篇論茶

色

茶色貴白而餅茶多以珍膏油

去聲

其面故有青黃紫黑

之異善別茶湯正如相工之眎人氣色也隱然察之於  
內以肉理潤者為上既已末之黃白者受水昏重青白  
者受水鮮明故建安人鬪試以青白勝黃白

香

茶有真香而入貢者微以龍腦和膏欲助其香建安民  
間試茶皆不入香恐奪其真若烹點之際又雜珍果香  
草其奪益甚永不當用

味

茶味主於甘滑惟北苑鳳皇山連屬諸焙所產者味佳  
隔溪諸山雖及時加意製作色味皆重莫能及也又有  
水泉不甘能損茶味前世之論水品者以此

### 藏茶

茶宜弱葉而畏香藥喜溫燥而忌濕冷故收藏之家以  
弱葉封裹入焙中兩三日一次用火當如人體溫溫則  
禦濕潤若火多則茶焦不可食

### 炙茶

茶或經年則香色味皆陳於淨器中以沸湯漬之刮去膏油一兩重乃止以鈴籍之微火炙乾然後碎碾若當年新茶則不用此說

碾茶

碾茶先以淨紙密裹槌碎然後熟碾其大要旋碾則色白或經宿則色已昏矣

羅茶

羅細則茶浮麤則水浮

候湯

候湯最難未熟則沫浮過熟則茶沈前世謂之蟹眼湯者過熟湯也況餅中煮之不可辨故曰候湯最難

燂盞

凡欲點茶先須燂盞令熱冷則茶不浮

點茶

茶少湯多則雲脚散湯少茶多則粥面聚

建人謂之雲脚粥面

抄

茶一淺盞先注湯調極均又添注入環迴擊沸湯上盞

可四分則止眠其面色鮮白著蓋無水痕為絕佳建安  
聞茶以水痕先沒者為負俟久者為勝故較勝負之說  
曰相去一水兩水

下篇論茶器

茶焙

茶焙編竹為之裹以弱葉蓋其上以收火也隔其中以  
有容也納火其下去茶尺許常溫溫然所以養茶色香  
味也

茶籠

茶不入焙者宜密封裹以弱籠盛之高處不近濕氣

砧椎

砧椎蓋以碎茶砧以木為之椎或金或鐵取於使用

茶鈴

茶鈴屈金鐵為之用以炙茶

茶碾

茶碾以銀或鐵為之黃金性柔銅及鋤石皆能生銹

音星

不入用

茶羅

茶羅以絕細為佳羅底用蜀東川鵝溪畫絹之密者投湯中揉洗以幕之

茶盞

茶色白宜黑盞建安所造者紺黑紋如兔毫其坯微厚燴之久熱難冷最為要用出他處者或薄或色紫皆不及也其青白盞鬪試家自不用



茶匙

茶匙要用擊拂有力黃金為上人間以銀鐵為之竹者輕建茶不取

湯瓶

瓶要小者易候湯又點茶注湯有準黃金為上人間以銀鐵或瓷石為之

龍茶錄後序

歐陽永叔

茶為物之至精而小團又其精者錄序所謂上品龍茶

者是也蓋自君謨始造而歲貢焉仁宗尤所珍惜雖輔相之臣未嘗輒賜惟南郊大禮致齋之夕中書樞密院各四人共賜一餅宮人剪金為龍鳳花草貼其上兩府八家分割以歸不敢碾試宰相家藏以為寶時有佳客出而傳玩爾嘉祐七年親享明堂齋夕始人賜一餅余亦忝與至今藏之余自以諫官供奉仗內至登二府二十餘年纔一獲賜而丹成龍駕舐鼎莫及每一捧翫涕泗交零而已因君謨著錄輒附于後庶知小團自君謨

始而可貴如此

顧渚貢茶始末

陸羽茶經云浙西以湖州上常州次湖州生長興縣顧渚山中常州義興縣生君山懸腳嶺北峯下唐義興縣重修茶舍記云義興貢茶非舊也前此故御史大夫李栖筠實典是邦山僧有獻佳茗者會客嘗之野人陸羽以為芬香甘辣冠于他境可薦于上栖筠從之始進萬兩此其濫觴也厥後因之徵獻浸廣遂為任土之貢與

常賦之邦等矣

北苑貢茶始末

建安北苑茶始於太宗太平興國三年遣使造之取象於龍鳳以別入貢至道間仍添造石乳蠟面其後大小龍茶又起於丁謂而成於蔡君謨至宣政間鄭可簡以貢茶進用久領漕計創添續入其數浸廣今猶因之細色茶五綱凡四十三品形製各異共七千餘餅其間貢新試新龍團勝雪白茶御苑玉芽此五品乃水揀為第

一餘乃生揀次之又有麓色茶七綱凡五品大小龍鳳并揀芽悉入龍腦和膏為團餅茶共四萬餘餅蓋水揀茶即社前者生揀茶即火前者麓色茶即雨前者閩中地暖雨前茶已老而味加重矣又有石門乳吉香口三外焙亦隸於北苑皆採摘茶芽送官焙添造每歲糜金共二萬餘緡日役千夫凡兩月方能迄事第所造之茶不許過數入貢之後市無貨者人所罕得惟壑源諸處私焙茶其絕品亦可敵官焙自昔至今亦皆入貢其流

販四方悉私焙茶耳

茗溪  
漁隱

茶說

蘇子瞻

除煩去膩世固不可以無茶然暗中損人殆為不少昔人云白茗飲盛後人多患氣不復患黃雖損益相半而消陽助陰益不償損也吾有一法常自珍之每食已輒以濃茶漱口煩膩既去而脾胃不知凡肉之在齒間得茶漱滌之乃盡消縮不覺脫去不煩刺挑也而齒性便苦緣此漸堅密蠹毒自己然率用中下茶其上茶自不

常有間數日一啜亦不為害也此大是有理而人罕知是故詳述子瞻記

謝傅尚書茶書

楊廷秀

遠餉新茗當自攜大瓢走汲溪泉東澗底之散薪燃折脚之石鼎烹玉塵啜香乳以享天上故人之意媿無胸中之書傳但一味攪破菜園耳

煎茶賦

黃魯直

洶洶乎如澗松之發清吹皓皓乎如春空之行白雲賓

主欲眠而同味水茗相投而不渾苦口利病解膠滌昏  
未嘗一日不放著而策茗椀之勲者也余嘗為嗣直論  
茗因錄其滌煩破睡之功為之甲乙建溪如割雙井如  
鑄日鑄如鑄其餘苦則辛螫甘則底滯嘔酸寒胃令人  
失眠亦未足與議或曰無甚高論敢問其次涪翁曰味  
江之羅山嚴道之蒙頂黔陽之都濡高株瀘川之納溪  
梅嶺夷陵之壓塼邛之火井不得已而去於三則六者  
亦可酌兔褐之甌瀹魚眼之鼎者也或者又曰寒中瘡



氣莫甚於茶或濟之鹽白踐破家滑竅走水又況雞蘓  
之與胡麻涪翁於是酌岐雷之醪醴參伊聖之湯液斲  
附子如博投以熬葛仙之堊去藪而用鹽去橘而用薑  
不奪茗味而佐以草石之良所以固太倉而堅作彊於  
是有胡桃松實菴摩鴨脚敦賀糜蕪水蘇甘菊既加臭  
味亦厚賓客前四後四各用其一少則美多則惡發揮  
其精神又益於咀嚼蓋大匠無可棄之才太平非一士  
之略厥初貪味雋永速化湯餅乃至中夜不眠耿耿既

作溫齊殊可屢軟如以六經濟三尺法雖有除治與人  
安樂賓至則煎去則就榻不游軒后之華胥則化莊周  
之蝴蝶

古詩

修貢顧渚茶山作

唐袁高

禹貢通遠俗始圖在安人後主失其本職吏不敢陳亦  
有奸佞者因茲欲求伸動生千金費日使萬姓貧我來  
顧渚源得與茶事親黎氓輟農桑採掇實苦辛一夫且

當役盡室皆同臻捫葛上歌壁蓬頭入荒榛終朝不盈  
掬手足皆鱗皴悲嗟遍空山草木為不春陰嶺芽未吐  
使曹牒已頻心爭造化先走挺麋鹿均選納無日夜擣  
聲昏繫晨衆功何枯櫨俯視彌傷神皇帝尚巡狩東郊  
路多堙周迴繞天涯所獻惟艱勤况減兵革用兼茲困  
疲民未知供御餘誰合分此珍顧省忝邦守有慙復因  
循茫茫滄海間丹憤何由申

與孟郊洛北野泉上煎茶  
劉言史

粉細越笋芽野煎寒溪濱恐乖靈草性觸事皆手親敲  
石取鮮火撇泉避腥鱗熒熒爨風鐺拾得墜巢新潔色  
既爽別浮氤亦慙慙以茲委曲靜求得正味真宛如摘  
山時自歎指下春湘瓷泛輕花滌盡昏渴神此遊愜醒  
趣可以話高人

北苑

共五首

蔡君謨

蒼山走千里斗落分兩臂靈泉出池清嘉卉得天味入  
門脫世氛官曹真傲吏

茶壠

造化曾無私亦有意所嘉夜雨作春力朝雲護日車千  
萬碧天枝戢戢抽靈芽

採茶

春衫逐紅旗散入青林下陰崖喜先至新苗漸盈把競  
攜筠籠錦更帶山雲寫

造茶

糜至寸陰間搏金新範裏規星月正圓勢動龍初起出

焙香花全爭誇火候是

試茶

兔毫紫甌新蟹眼清泉煮雪凍作成花雲閒未垂縷願  
爾池中波去作人間雨

問大冶長老乞桃花茶栽東坡

蘇子瞻

周詩記苦茶茗飲出近世初緣厭肉梁假此雪昏滯嗟  
我五畝園桑麥苦蒙翳不令寸地閒更乞茶子藝饑寒

未知免已作太飽計庶將通有無農末不相戾春來凍  
地裂紫筍森已銳牛羊煩訶叱筐筥未敢睨江南老道  
人齒髮日夜逝他年雪滿堂尚記桃花裔

走筆謝孟諫議寄新茶 盧仝

日高丈五睡正濃軍將打門驚周公口云諫議送書信  
白絹斜封三道印開緘宛見諫議面手閱月團三百片  
問道新年入山裏蟄虫驚動春風起天子須嘗陽羨茶  
百草不敢先開花仁風暗結珠琲瑠先春抽出黃金芽

摘鮮焙芳旋封裹至精至好且不奢至尊之餘合王公  
何事便到山人家柴門反關無俗客紗帽籠頭自煎喫  
碧雲引風吹不斷白花浮光凝碗面一碗喉吻潤二碗  
破孤悶三碗搜枯腸唯有文字五千卷四碗發輕汗平  
生不平事盡向毛孔散五碗肌骨清六碗通仙靈七碗  
喫不得也唯覺兩腋習習清風生蓬萊山在何處玉川  
子乘此清風欲歸去山下羣仙司下土地位清高隔風  
雨安得知百萬億蒼生墮在巔崖受辛苦便為諫議



問蒼生到頭還得蘇息否

石園蘭若試茶歌

劉禹錫

山僧後檐茶數叢春來映竹抽新茸宛然為客振衣起  
自傍芳叢摘鷹觜斯須炒成滿室香便酌砌下金沙水  
驟雨松聲入鼎來白雲滿碗花徘徊悠揚噴鼻宿醒散  
清峭徹骨煩衿開陽崖陰嶺各殊氣若竹下莓苔地  
炎帝雖嘗未解煎桐君有錄那知味新芽連拳半未舒  
自摘至煎俄頃餘木蘭墜露香微似瑤草臨波色不如

僧言靈味宜幽寂采采翹英為嘉客不辭緘封寄郡齋  
甌井銅鑪損標格何況蒙山顧渚春白泥赤印走風塵  
欲知花乳清冷味須是眠雲跂石人

和章岷從事鬪茶歌

范希文

年年春自東南來建溪先暖水微開溪邊奇茗冠天下  
武夷仙人從古栽新雷昨夜發何處家家嬉笑穿雲去  
露芽錯落一番榮綴玉含珠散嘉樹終朝采掇未盈襜  
唯求精粹不敢貪研膏焙乳有雅製方中圭兮圓中蟾

北苑將期獻天子林下雄豪先鬪美  
鼎磨雲外首山銅瓶攜江上中瀾水  
黃金碾畔綠塵飛碧玉甌中翠濤起  
鬪茶味兮輕醖醑鬪茶香兮薄蘭芷  
其間品第胡能欺十目視而十手指  
勝若登仙不可攀輸同降將無窮恥  
吁嗟天產石上英論功不愧階前藁  
衆人之濁我可清千日之醉我可醒  
屈原試與招魂魄劉伶却得聞雷霆  
盧仝敢不歌陸羽須作經森然萬象  
中焉知無茶星商山丈人休茹芝  
首陽先生休采薇長安酒價減千萬  
成

都藥市無光輝不如仙山一啜好冷然便欲乘風飛君  
莫羨花間女郎只鬪草贏得珠璣滿斗歸

嘗新茶呈聖俞

歐陽永叔

建安三千里京師三月嘗新茶人情好先務取勝百物  
貴早相矜夸年窮臘盡春欲動蟄雷未起驅龍蛇夜聞  
擊鼓滿山谷千人助叫聲喊呀萬木寒癡睡不醒唯有  
此樹先萌芽乃知此為最靈物宜其獨得天地之英華  
終朝採摘不盈掬通犀銙小圓復窅鄙哉穀雨槍與旗

多不足貴如刈麻建安太守急寄我香朥包裹封題斜  
泉甘器潔天色好坐中揀擇客亦嘉新香嫩色如始造  
不似來遠從天涯停匙側盞試水路拭目向空看乳花  
可憐俗夫把金錠猛火炙背如鰕蟇由來真物有真賞  
坐逢詩老頻咨嗟須臾共起索酒飲何異奏雅終淫哇

煎茶歌

蘇子瞻

蟹眼已過魚眼生飈飈欲作松風鳴蒙茸出磨細珠落  
眩轉遶甌飛雪輕銀瓶瀉湯誇第二未識古人煎水意

君不見昔時李生好客手自煎貴從活火發新泉又不  
見今時潞公煎茶學西蜀定州花甕琢紅玉我今貧病  
常苦飢分無玉盃奉蛾眉且學公家作茗飲塲爐石銚  
行相隨不用撐腸拄腹文字五千卷但願一甌常及睡  
足日高時

謝送碾壑源揀芽

黃魯直

香雲從龍小蒼壁元豐至今人未識壑源包貢第一春  
湘奩碾香供玉食睿思殿東金井欄甘露薦椀天開顏

橋山事嚴尤百局補袞諸公省中宿中人傳賜夜未央  
雨露恩光照宮燭右丞似是李元禮好事風流有涇渭  
肯憐天祿校書郎親敕家庭遣分似春風飽識大官手  
不慣腐儒湯餅腸搜攪千年燈火讀令我胷中書傳香  
已成應門老馬走客來問字莫載酒

以小團龍及半鋌贈無咎并詩用前韻為戲

黃魯直

我持玄珪與蒼璧以暗投人渠不識城南窮巷有佳人

不索賓郎常宴食赤銅茗椀雨班班銀粟翻光解破顏  
上有龍文下碁局探囊贈君諾已宿此物已是元豐春  
先皇聖功調玉燭晁子胷中開典禮平生自期莘與渭  
故用澆君磊砢胷莫令鬢毛雪相似曲几蒲團聽煮湯  
煎成車聲繞羊腸雞蘇胡麻留渴羌不應亂我官焙香  
肌如瓢壺鼻雷吼幸君飲此勿飲酒

東坡讀羊腸之句曰黃九恁地怎得不窮

雙井茶送子瞻

黃魯直



人間風日不到處太上玉堂森寶書想見東坡舊居士  
揮毫百斛瀉明珠我家江南摘雲腴落磴霏霏雪不如  
為君喚起黃州夢歸載扁舟向五湖

謝木韞之舍人分送講筵賜茶

楊廷秀

吳綾縫裏染菊水蠻砂塗印題進字淳熙錫貢新水芽  
天珍誤落黃茅地故人鸞渚紫微郎金華講徹花草香  
宣賜龍焙第一網殿上走趨明月璫御前啜罷三卮露

滿袖香煙懷壁去歸來拈出兩蜿蜒雷電晦冥驚破柱  
北苑龍芽內樣新銅圍銀範鑄瓊塵九天寶月霏五雲  
玉龍雙舞黃金鱗老夫平生愛煮茗十年燒穿折脚鼎  
下山汲井得甘冷上山摘芽得苦梗何曾夢到龍遊窠  
何曾夢喫龍芽茶故人分送玉川子春風來自玉皇家  
煨圭椎壁調冰水烹龍庖鳳搜肝髓石花紫笋可衙官  
赤印白泥牛走爾故人氣味茶樣清故人風骨茶樣明  
開緘不但似見面叩之咳唾金石聲麴生勸人墮巾幘

睡魔遣我拋書冊老夫七碗病未能一啜猶堪坐秋夕

澹菴坐上顯上人分茶

楊廷秀

分茶何似煎茶好煎茶不似分茶巧  
蒸水老禪弄泉手  
隆興見春新玉爪二者相遭兔甌面  
恠恠竒竒真善幻  
紛如擘絮行太空影落寒江能萬變  
銀瓶首下仍尻高  
注湯作字勢嫋姚不須更師屋漏法  
只問此瓶當響答  
紫微仙人烏角巾喚我起看清風生  
京塵滿袖思一洗  
病眼生花得再明漢鼎難調要公理  
策勲茗椀非公事

不如回施與寒儒歸讀茶經傳衲子

律詩

北苑焙新茶

丁公言

北苑龍茶者甘鮮的是珍四方惟數此萬物更無新  
纔吐微茫綠初沾少許春散尋紫樹遍急採上山頻宿葉  
寒猶在芳芽冷未伸茅茨溪口焙籃籠雨中民長疾勾  
萌折開齊分兩勻帶煙蒸雀舌和露疊龍鱗作貢勝諸  
道先嘗祇貴人緘封瞻闕下郵傳渡江濱特旨留丹禁

殊恩賜近臣，啜將靈藥助。用與上尊親，頭進英華盡。初烹氣味真，細香勝却麝。淺色過於筠，顧渚慙投木。宜都愧積薪，年年號供御。天產壯甌閩。

以潞公所惠揀芽送公擇次舊韻

黃魯直

慶雲十六升，龍樣國老元。年密賜來披拂，龍紋射牛斗。外家英鑒似張雷。

奉同公擇作揀芽詠

赤囊歲上雙龍壁

囊貢小團赤  
揀芽則雙龍

曾見前朝盛事來想得

天香隨御所延春閣

元豐末作  
延春閣

道轉春雷

今歲官茶極妙而難為賞音者戲用雷字韻

復作兩詩

黃魯直

雞蘇狗蟲難同味懷取君恩歸去來  
青箬湖邊尋陸顧  
白蓮社裏覓宗雷  
乳花翻腕正眉開  
時苦渴羌行熱  
來知味者誰心已許維摩能默語如雷

又戲為雙井解嘲

黃魯直

山芽落磴風回雪曾為尚書破睡來勿以姬姜棄顛顚  
逢時瓦釜亦鳴雷

奉同六舅尚書詠茶碾煎烹三首

黃魯直

要及新香碾一盃不因傳寶到雲來碎身粉骨方餘味  
莫厭聲喧萬壑雷

風爐小鼎不須催魚眼長隨蟹眼來深注寒泉收第一  
亦防枵腹爆乾雷

乳粥瓊塵霧脚回色香未觸映根來睡魔有耳不足掩  
直拂繩床過疾雷

次韻曹輔寄壑源試焙新芽

壑源與北苑纔三里餘其茶甘香特在諸私焙之上

蘇子瞻

仙山靈雨濕行雲洗遍香肌粉未勻明月來投玉川子  
清風吹破武林春要知玉雪心腸好不是膏油首面新  
戲作小詩君一笑從來佳茗似佳人



詩話

會湖常境上

唐茶惟湖州紫筍入貢每歲以清明日貢到先薦宗廟  
然後分賜近臣紫筍生顧渚在湖常二境之間當采茶  
時兩郡守畢至最為盛集白樂天守姑蘇聞賈常州崔  
湖州茶山境會寄詩云遙聞境會茶山夜珠翠歌鍾俱  
遶身盤下中分兩州界尊前合作一家春

雀舌下材

茶芽古人謂之雀舌麥顆言其至嫩也今茶之美者其質素良而所植之木又美則新芽一發便長寸餘其細如針唯牙長為上品以其質幹土力皆有餘故也如雀舌麥顆者極下材耳乃北人不識誤為品題予山居有茶論嘗茶詩云誰把嫩香名雀舌定應北客未曾嘗不知靈草天然異一夜風吹一寸長

論槍旗

荆公送元厚之詩云新茗齋中試一旗世謂茶之始生

而嫩者則為一槍寢大而開謂一旗過此則不堪矣荆公博學多聞豈自有所稽而非淺陋之能察也

塵史

### 茶用鹽薑

唐人煎茶用薑故薛能詩云鹽損添常戒薑宜著更誇據此則又有用鹽者矣近世有用此二物者輒大笑之然茶之中等者用薑煎信佳也鹽則不可

東坡

雜著

以下係  
水品

### 水錄

張又新

仁宗時李季卿刺湖州至維揚遇陸鴻漸謂曰陸君善  
茶天下所聞揚子南零水又殊絕今者二妙千載一遇  
何可輕失乃命軍士信謹者挈瓶操舟深詣南零陸潔  
器以俟俄水至陸以杓揚水曰江則江矣非南零者似  
臨岸者使稱不敢給既而傾諸盆至半遽止又以杓揚  
之曰此南零者矣使蹶然駭服曰某自南零齎至岸舟  
盪半懼其虧挹岸水以增之處士之鑒神鑒也李大驚  
陸又曰楚水第一晉水最下自命吏占而次第之

大明水記

歐陽永叔

世傳陸羽茶經其論水云山水上江次井水下又云山水乳泉石池漫流者上瀑湧湍漱勿食食久令人有頸疾江水取去人遠者井取汲多者其說止於此而未嘗品第天下之水味也至張又新為煎茶水記始云劉伯藹謂水之宜茶者有七等又載羽為李秀卿論水次第有二十種今考二說與羽茶經皆不合謂山水上乳泉石池為上江次而井水下伯藹以揚子江為第一

惠山石泉為第二虎丘石泉第三丹陽寺井第四揚州  
大明寺井第五而松江第六淮水第七與羽說皆相反  
秀卿所說二十水廬山康王谷水第一無錫惠山泉第  
二蘄州蘭溪石下水第三扇子峽蝦蟆口水第四虎丘  
寺井水第五廬山招賢寺下方橋潭水第六揚子江南  
零水第七洪州西山瀑布第八桐柏淮源第九廬山龍  
池山頂水第十丹陽寺井第十一揚州大明寺井第十  
二漢江南零水第十三玉虛洞香溪水第十四武關西

水第十五松江水第十六天臺十丈瀑布水第十七柳  
州圓泉第十八嚴陵灘水第十九雪水第二十如蝦蟆  
口水西山瀑布天臺十丈瀑布皆戒人勿食食之生疾  
其餘江水居山水上井水居江水上皆與陸羽經相反  
疑羽不當二說以自異使誠羽說何足信也得非又新  
妄附益之耶其述羽辨南零岸水恠誕甚妄也水味有  
美惡而已欲求天下之水一二而次第之者妄說也故  
其為說前後不同如此然此井為水之美者也羽之論

水惡渟浸而喜泉源故井取汲者江雖長然衆雜聚故  
次山水

鬪茶說

唐子西

唐相李衛公好飲惠山泉置驛傳送不遠數千里而近  
世歐陽少師作龍茶後序稱嘉祐七年親享明堂致齋  
之夕始以小團分賜二府人給一餅不敢碾試至今藏  
之時熙寧元年也吾聞茶不問團錫要之貴新水不問  
江井要之貴活千里致水真偽固不可知就令識真已



非活水自嘉祐七年壬寅至熙寧元年戊申首尾七年  
更閱三朝而賜茶猶在此豈復有茶也哉今吾提瓶走  
龍塘無數千步此水宜茶昔人以為不減清遠峽而海  
道趨建安不數日可至故每歲新茶不過三月至矣

古詩

焦千之求惠山泉詩

蘇子瞻

茲山定空中乳水滿其腹遇隙則發見臭味實一簇淺  
深各有值方圓隨所蓄或為雲洶湧或作線斷續或鳴

人辨淄澠皎若鶴與鳬吾今既謝此但視符有無常恐  
汲水人智出符之餘多防竟無及棄置為長吁

惠山泉

黃魯直

錫谷寒泉橐石俱

橐音安蓋取井旁數小石置瓶中澄水令不濁

併得新詩薑

尾書急呼烹鼎供茗事澄江急雨看跳珠是功與世滌  
膾腴今我一空常宴如安得左轡箕頴尾風爐煮茗卧  
西湖

律詩

陸羽茶井

王元之

甃石封苔百尺深  
試茶嘗味少知音  
惟餘半夜泉中月  
留得先生一片心

古今事文類聚續集卷十二